

**Public Legal
Information**
Association of NL

**Uauitamatun auenitshenat eka ka
minu-tutuakanit nete uikanishimat
ka piuenimakanit** Sheshatshiu Dialect



Eshi-takuak tshekuan ka uauitakanit:

- Eshi-takuak uauitshitun
P. 4
- Ka atushkatakau Tshishe-utshimaua utapuetamunnu eshi-
pimipanitanit
P. 9
- Tshakuan tshipa tshisseniten eshk^u eka uauitamin ka ishi-
tshissenitanit nete ka ueueshtakanit
P. 14
- Eshinikatenikau anuenimituna
P. 20
- Kaueueshtakanit aimuna ka apashtanikau
P. 23

Ka uauitshiat kie ka tshishkutamuat auenu Tshishe-utshimaua utapuetamunnu, ka peikuitishut kie uinuau ka pimipanitishut anite ut Akamississit kie Labrador tshetshi nishtutatishunanut. Mamu atushkatamupanit tshetshi etu minu-uauitshiakanit e uauitamuakanit auenitshenat ka nanatu-apatakau uauitshitunnu anite Tshishe-utshimaua utapuetamunit tshetshi nishtutatishut.

Anitshenat ka peikupimipanitishut (PLIAN) minuatuamut katshi nishtuapamat Tshishe-utshimaua utapuetamunnu ka atushkataminiti kie ka patshitinak shunianu tshetshi atushkatenit umenu mashinaikanissinu.

PLIAN ka peikuitishut kie ka peikupimipanitishut mishta-nashkumeuat Tshishe-utshimaua Akamississit kie Labrador anite ut ka atushkataminiti Piuenumitun ka atushkatakanit tshetshi nikaikanit ka pitshitinak shunianu tshetshi nanatu-tshissenitakanit, mashinataikanit e akaneshaushtakanit tshetshi tutakanit mashinaikanissinu.

Tshima uitshikut umenu mashinaikanissinu, anitshenat eka ka minu-tutuakanit uikanishimauat ka piuenimakanit anite ka tatau Akamississit mak Labrador. PLIAN ka ishinikatakanit ka peikupimipanitishut nashtuapameut mitshet auennua ka uauitshikuht nenu mashinaikanissinu ka tutahk. Kassinu nashkumakanut.

Kristen O'Keefe
Utshimashkueu ka pimipanitat atusseunu

Anne Rich ka ashushtat mashinaikannu
Marguerite MacKenzie ka aiatashtat mashinaikannu

Copyright PLIAN 2009
ISBN: 978-1-894829-73-1

Ume mashinaikaniss ka tutakanit muk^u tshi uauitamakunau uauitamatum, namaieu etenitakanit tshetshi uitamakuiek^u tshipa ishi-tutenau tshekuan nete ka ueeshtakanit. Ui uitshikushiek^u, tshe aimiek^u kaimisht.

This publication contains general information only, and is not intended to provide legal advice. For legal advice, contact a lawyer.

Ka uitapimek^u nipiuenimik^u. Tshekuana eshinakuaniti tshetshi uitshikauian?

Nasht apu ishinakuanit tshetshi piuenimakanit kie nanatu-shetshiakanit auen. Piuenimakauini kie mak nanatu-shetshikauini, takuanua tshipa ishi-uitshikaun. Passe muk^u tshika uauitamakaun eshinakuanikau eshi-uitshiakanit auen. Muk^u nenu nasht eshinakuanikau tshetshi tshissenitamin tshika uauitamakaun. Tshipa aimiau kaimisht tshetshi uauitamut eshi-tipenitamek^u tshekuana. Kie peik^u utinamini ne tshe ishi-uitshikuin, takuana kutak tshipa ishi-uitshikaun.

Tshin tshipa tshi:

1. Aimiauat kamakunueshiht tshetshi mamishimit
2. Shakassinitan mashinaikan tshetshi nakatuapamikauin (EPO)
3. Shakassinitan mashinaikan nete kaueueshtakanit ka utinakanit tshetshi mashinatautishut ne ka piuenimishk kie tshetshi eka pikunak etashumakanit

Shutshenimitishun mishta-ishpitenitakuan tshetshi kanuenitamin mamu tshitauassimat.

Eshi-ueeshiakanit Eka ka minu-tutak:

Kamakunueshiht nanatu-tshissenitamuat ka mamishimakanit uikanishimau ka pieuenimat uikanisha. Mishta-uipat tshipa mamishitsheumun. Tshika kuetshimikaun tshetshi mashinataikanit eshi-mamishitsheumuin kie auenitshenat eshinikatakanit ka tshissenitak eshpanit eka ka minu-tutakuin. Ek^u katshi mamishitsheuminanuti, ne eka ka minu-tutak tshipa tshi makunakanu. Kie uin tshika aimiku kamakunueshiniti.

Nanikutini kamakunueshiht ueeshieuat nenu ka mamishimakaniti. Patush nasht tapuetatishutau kamakunueshiht nenu eka minu-tutaminiti auennu, tshipa tshi ueeshieut. Uinuu anitshenat kamakunueshiht uetashutamuat katshi nasht nukuaniti nenu eka minu-tutakaniti.

Ek^u katshi makunakaniti ne eka ka minu-tutak, tshipa tshi unuitishinakanu nasht tapuetatishuti tshetshi nashak etashumakanit nete ut ka ueueshtakanit. Nenu mashinaikannu minakanu tshetshi mashinatautishut ishinikatakanu ka nashatakanit etashumakanit mashinaikan. Nasht tshika ui tutam^u etashumakanit ne eka ka minu-tutak. Ek^u pikunaki nenu etashumakanit, minuat tshipa tshi ueueshiakanu. Kie tshissenimiti pikunaki nenu ka itashumakanit uipat tshe aimitau kamakunueshit. Mishta-pikunam^u nenu ka itashumakanit ishi-tshitapatakanu nete ka ueueshtakanit.

Ek^u katshi ueueshiatau anitshenat kamakunueshiht, Tshishe-utshimau ukaimishima uetashutam^u tshetshi ueueshiakaniti anite ka ueueshtakanit. Apu tshika ut muk^u tshi tapuetak ne Tshishe-utshimau ukaimishima tshetshi unuitishinakanit ne eka ka minu-tutak. Mitshetuait tshika tshitapatakanu nenu eshi-ueueshiakanit tshetshi uepinakanit nenu eshi-ueueshiakanit. Namaieutshe kamakunueshiht kie mak ne eka ka minu-tutuakanit tshe tshissenitak tshe itashumakaniti.

Ek^u ishinakaniti tshetshi itutakanit nete kaueueshtakanit, ne eka ka minu-tutak tshika kuetshimakanu tshetshi (tapuemakanit kie mak eka tapuemakanit). Ek^u issishueti 'nitapuemakaun', ekuta nete ka ueueshiakanit tshe anuenimakanit kie mak natshe patush. Eku issishueti 'apu tapuemakuiian', ek^u tshika pimipaniakanu nete kaueueshtakanit aishkat patush.

Anitshenat ka uauitshiat auennu eka ka minu-tutuakaniti tutamupanat mashinaikanissinu, eshi-pimipanit kaueueshtakanit uauitamun. Kie anite takuan ka atusseu tshitapatakanit website (www.gov.nl.ca/vpi)

Ka nakatuenimakanit ka piuenimakanit kaimit umashinaikan

Shet An pishim^u 1, 2006, anitshenat ka peikupimipanitishut Uikanishimaun Piuenimitun Ka Nakatuenitakanit Tshishe-utshimau utapuetamun tutakanipan nete Akamississit mak Labrador. Ume tapuetamun tutakanipan tshetshi uitshikut anitshenat ka piuenimikut uikanisha auenitshenat kie utauassimuau. Anite kaueueshtakanit tshika shakassinitan mashinaikan. Kie uipat tshi shakassinitaini tshi

mashinaikan nishunnu ashu neu tatutipaikana ishpish tshika ashuapaten eukuan eshi-tutakanit auen ka piuenimikut uikanisha.

Patush tshetshi minikauin ne mashinaikan, tshika ui uitapimau ne tshitimush kie mak tshinapem kie mak taut tshitauassimuaauat kie tapue nasht tshipiuenimik^u ne ka uitapimit. Ne uitapimitun ishi-tshitapatakanu ka nipauitau, ka uitapimituht kie tapishkut ishkuueat kie mak napeuat ka uitapimituht. Eukuannu patush tshetshi utinikut kamakunueshiniti tati nete uitshit, kie tshika utinakanua upassikana kie kutakanu eshi-kushtikuanit eshi-kanuenitashut, tshin tshika minikun tshetshi uitapimit ne tshitauassimuaau nete tshitshit kie kutaka tshekuana etenitakaniti tshipa ishi-nashatam^u etashumakanit.

Kamakunueshiht tshipa tshi uitshikuat shakassinitain tshimashinaikan tshetshi nakatuenimikauin nishunnu ashu neu tatutipaikana eshakumitshishikua. Tshika natuenitamakaun tshetshi mashinatautishuin mashinaikan nenu e tapuetutau kamakunueshiht tshetshi shakassinitat tshimashinaikannu. Ek^u tshin uetshit shakassinitaini tshimashinaikan, kie mak kaimisht uitshishki, patush e atussenanuti nete kaueueshtakanit tshetshi natshi-shakassinitain tshimashinaikan. Anite kaueueshtakanit takuanua nenu mashinaikana kie mak anite ka atusseu-tshitapatakanit website (<http://www.court.nl.ca/provincial/>). Kie takuan ne etashtet ka aiminanut nete ka aiminaniu-mashinaikanit nete “Ka Ueueshtakanit” (Courts).

Nanikutini, uin muk^u kaimit uetashutam^u nenu mashinaikannu e nakatuenimakanit auennu, nishunnu ashu neu tatutipaikana tshika ashuapatam^u katshi shakassinitati nenu umashinaikan kaiminiti itashueniti.

Anitshenat ka peikuitishut Uikanishimau tshetshi eka piuenimakaniti etatu minu-uauitakanu nete ka atusseu tshitapatakanit, anite (<http://www.court.nl.ca/provincial/>)

Mashinaikan ka tutakanit nete kaueueshtakanit tshetshi eka pikunakanit etashumakanit ne eka ka minu-tutak

Tshishe-utshimau Utapuetamun 810 ka itashtenit nete kaueueshtakanit utinakanu ne mashinaikan tshetshi nashatak etashumakanit auen. Tshetshi eka nutshikashut; tshetshi eka aimiat nenu eka ka minu-tutuat; kie mak tshetshi eka kanuenitak passikannu. (Mitshet ishi-uauitakanu ume mashinaikan ka uauitakanit).

Takuan tipaikan tshetshi nekaikanit ne mashinaikan uikanishimau ka piuenimat uitshinnu tshetshi eka piuenimat. Eukuan ume eshi-takuak ne e tshitapakanit nete mashinaikanit:

- Apu nakatuapatakau nenu mashinaikannu anitshenat kamakunueshiht.
- Patush katshi pikunakaniti nenu ka itashumakaniti ek^u kamakunueshiht aiatinakau.
- Minekashish tshika ashuapatam^u umashinaikan tshetshi katshitinak.

Nishuait ishinakuana nenu mashinaikana tshipa ishi-tuten shaka sinitaini:

Mashinaikan shakassinitakanu tanite tshikushten tshetshi uiesh tutakuiek^u tshin mak tshitauassimat;

Mashinaikan shakassinitakanu tanite tshikushten tshetshi pikunakanit ka ishi-tipenitamin tshekuan.

Anite Kaueueshtakanit tutakanua nenu mashinaikana. Kie uauitakanua kaiminanuti etashti ute Akamississit mak Labrador:

St. John's (709) 729-1004

Harbour Grace (709) 596-6141

Placentia(709) 227-2002

Clarenville(709) 466-2635

Grand Bank (709) 832-1450

Gander (709) 256-1100

Grand Falls- Windsor (709) 292-4212

Corner Brook (709) 637-2323

Stephenville (709) 643-2966

Happy Valley- Goose Bay (709) 896-7870
Wabush(709) 282-6617

Tutamini ne tshimashinaikan nete kaueueshtakanit tshika itashumakaun tshetshi uapamitau kamakunueshiht.

Ek^u katshi tshishtaini tshimashinaikan kie kassinu uitamini tshakuan nete ka ueueshtakanit, mashinaikannu tshika minakanu ne ka mamishimit tshetshi itutet nete kaueueshtakanit. Tshika uitamuakanu tshe ishpish ueeshiakanit. Kie tshin tshika tan nete kaueueshtakanit. Ek^u eka tapuetaiki nenu eshi-natuenitamuakanit tshe ishi-nashak mashinaikannu etashtakanit, patush nanatshe tshika pimipaniakanu nete kaueueshtakanit tshetshi uauitak nenu eka ishi-tapuetaik.

Anite kaueueshtakanit, tshika uauiten eshi-tshissenitamin, kie anitshenat ka tatau ka uapamitakuht eka ka minupanikut kie uinuau eshi-tshissenitaku tshika uauitamuat. Nasht tshe ui petain tshakuan tshe uitshikauin nete ueueshiakaniti ne eka ka minu-tutashk. Kie uin ne ka piuenimishk tshika minakanu tshetshi uauitak ka ishi-tshissenitak kie nenu auennu tshe uitshikut etenimat ka tshissenitamaniti eshpanit tshekuannu. Uin kaimit tshika uetashutam^u tshetshi minat mashinaikannu eshi-natuenitamuakanit tshe tutak tshekuannu kie nasht kutunnu ashu nishupishimua tshika minuau nenu umashinaikan ka nakatuapamakanit.

Ek^u minakaniti nenu mashinaikannu ka nakatuenimakanit, pikunaki uipat tshe aimitau kamakunueshit. Tshipa tshi ueueshiakanu ka pikunak e nakatuenimakanit. Ek^u tapuemakaniti nenu eshi-ueueshiakanit tshipa tshi makunakanu.

Anitshenat ka peikuitishut ka uitshiat auennu eka ka minu-tutuakaniti kanuenitamat mashinaikanissinu “Ka shakassinitakanit kaueueshtakanit mashinaikannu tshetshi eka pikunak etashumakanit auen” ishinikateu. (<http://www.court.nl.ca/provincial/>).

Anitshenat tshe natshishkutau nete Kaueueshtakanit eshi-pimipanitakanit

Tshin eka ka minu-tutakuin e piuenimikuin uikanishimat, mitshet auenitshenat tshika natshishkuauat etusset nete kaueueshtakanit eshi-pimipanitakanit. Eukuannua umenu passe kukuetshitschemuna ka ishi-kuetshitschemut anitshenat eka ka minu-tutuakanit uikanishimaunit ka piuenimakanit.

Tshekuan ne issishuanu ka mamishitsheumut kie ka ueeshiakanit?

Auen ka mamishitsheumut eukuan ka aimiat kamakunueshiniti ka uitamuat eka ka minu-tutuakanit kie mak ka uapatak eka ka minu-tutukanit. Nanikutini uin uetshit auen eka ka minu-tutuakanit. Ek^u ne auen eka ka minu-tutak eukuan ka itakanit apu minu-tututak.

Nitimush nitatinik^u eka tapuetuk kie nui mamishimau; auen tshe uitamuk?

Anitshenat kamakunueshiht tshe uitamutau. Kamakunueshiht tshika nanatu-tshissenitamuat ka mamishitsheumuin. Tatipan ishpanu tipaikan e nanatu-tshissenitakau kamakunueshiht katshi mamishimakaniti auen eka ka minu-tutak. Tshe aimitau ka nanatu-tshissenitakau kamakunueshiht nanikutini tshetshi uitamakuin tanite etatau kie tan eshi-nanatu-tshissenitakau nenu ka mamishitsheumut. Kie uinuu kamakunueshiht tshika tshissenitamuat tshetshi ueeshiakaniti nenu eka ka minu-tutamaniti katshi tshitapatakau nenu tshe ishi-ueeshiakaniti auenu eka ka minu-tutumaniti.

Ek^u ishinakuaniti tshetshi ueeshiakanit ne eka ka minu-tutak, ek^u Tshishe-utshimau ukaimishima tshe tshissenitak tshetshi pimipaniakaniti nete ka ueueshtakanit.

Tshek^u auen ne Tshishe-utshimau ukaimishima?

Kaimisht ishinikatakanua Tshishe-utshimau ukaimishima. Katshi tutakau kamakunueshiht tshetshi ueueshiakaniti nenu eka ka minu-tutaminiti, ek^u ne Tshishe-utshimau ukaimishima uetashutam^u tshetshi ueueshiakaniti nete ka ueueshtakanit. Nishuait tshi ishi-tshitapatakanu: nasht e nukuanit nenu eshi-mamishimakanit, kie takuaniti nenu tshekuannu uet mamishimakanit; kie ishinakuaniti tshetshi ueueshiakanit nete kaueueshtakanit. Ek^u tapuetaiki ne Tshishe-utshimau ukaimishima e nishiniti nenu tshe ishi-ueueshiakaniti, tshika pipipaniakanu nete kaueueshtakanit. Ek^u eka tapuemakaniti apu tshika ut ueueshiakanit.

Ne Tshishe-utshimau ukaimishima nin an nikaimishim?

Mauat, namaieu tshin uetshit tshikaimishim. Tshishe-utshimau nenu ukaimishima kie eukuan e atushkuat kassinu auennu ute Canada, auen ka pikunamuat Tshishe-utshimaua utapuetamuna ishinakuannu tshetshi ueueshiakanit. Tapishkut tshika ishi-tutam^u nenu ueueshiatshiakaniti auennu kie nenu ka mamishitshemushiniti, eshi-tshissenitamaniti tshekuannu kie nenu eka ka minu-tutaminiti.

Makunakanipan ninapem, tapuetuakanipan tshetshi aimiat kaimishinti. Tshek^u kaimishiniti nenu?

Nenu kaimishiniti anite ut Akamississit mak Labrador Ka Uauitshiat auennu ka ueueshiakaniti atusseu. Uauitshieu auennu ka ueueshiakaniti tshetshi uauitamatun eshinakuannit nenu eshi-ueueshiakaniti kie (tshetshi uitaminiti e tapuemakaniti kie mak eka tapuemakaniti).

Kamakunueshit nititikut tshika uishamikaun tshetshi uauitamin eshi-tshissenitamin. Tshekuannu nenu nititik^u?

Auen eshi-tshissenitak uauitam^u nete kaueueshtakanit tanite kanuenitam^u tshekuannu eshi-tshissenitak ka ishpanit.

Ishinakuan a tshetshi nanitam ituteian nete kaueueshtakanit?

Tshipa tshi ituten muk^u tshin, muk^u nasht ishinakuan tshetshi itutein katshi minikuin mashinaikan etashtet nasht tshika ituten ueueshtakaniti, kie uin kaimit itashki tshetshi itutein. Nanitam tshika minikun mashinaikan pitama tshetshi itutein nete kaueueshtakanit.

Ne ueshkat ka uitapamek^u nitimush ninanatu-shetshik, kie tshika ueueshiakanu. Tshekuannu uet tapuetuakanit tshetshi uitshikut kaimishiniti eka nasht tshishikuakaniti?

Anite ka ut uitshiakanit auen eka ka ukaimishimit uitshiakanitshe. Auenitshenat eka katshi tshishikuat kaimishiniti uitshiakanut tshetshi aimiat kaimishiniti. Ne ka uitapamit ueshkat tshitimush tshika ui shakassinitau mashinaikannu tshetshi uitshiakanit kie kassinu tshika ishi-nanatu-tshissenimakanu (Nenu eshi-tutak shunianu kie eshpish tutaka shunianu eukuau tshe tshitapakaniti).

Tshekuannu etutak kaimit?

Ne kaimit eukuau ka natututak kie ka uetashutak eshi-ueueshiakaniti auennu. Tapuemakaniti ne eka ka minu-tutak, uin kaimit tshika tshissenimeu tshe ishi-anuenimat, ek^u eka tapuemakaniti, tshika pimipaniakanu nete kaueueshtakanit. Ek^u tatau anitshenat ka kutunnueshit ashu nish^u, uinuau tshika tshissenimeuat tshetshi tapuemakaniti kie mak eka tapuemakaniti, uin ne kaimit eshk^u tshika anuenimeu kie uin tshika tshissenimeu tshe ishi-anuenimat.

Ek^u nete kaueueshtakanit uinuau kaimiht minu-tshitapatamuat tshetshi nashatakaniti nenu eshi-pimipanitakanit kaueueshtakanit, kie tshetshi minu-uauitaminiti nenu e nishiniti kaimishiniti (Tshishe-utshimau ukaimishima kie ne ueueshiakanit ukaimishima).

Tan tshe ishinikatak ne kaimit nete kaueueshtakanit?

Anite eshinakuak ka ueueshtakanit taini. Nete Akamississit mak Labrador kaueueshtakanit, Tshin Kaimit tshika ishinikatau. Ek^u nete ka mishta-ueueshtakanit Nikamishta-ueshtakanim Kaimit kie mak ishkueti ne kaimit Nitishkuem Kaimit tshika itau. Kie minuau tshetshi ishinikatet tshin napeu kie mak ishkuetu kaimit.

Tshekuen ne ka mashinaitshesht kaueueshtakanit?

Nenu ishi-atusseu uin uitamueu auenu piatutsheniti kaiminiti nete kaueueshtakanit. Nenu utakup kashteanu miam eshinakuanit kaimit ka apashtaua. Eshk^u eka uauitak auen eshi-tshissenitak pitama ne ka mashinaitshesht uitamueu nenu eshi-tshissenitamaniti, eshinikashuniti, nete uetshiniti kie kukuetshimeu tshetshi nasht ka tapuanunit ishi-uauitamaniti nenu eshi-tshissenitamaniti tshekuannu ka ishpanit. Kie uin aiatinam^u nenu eshi-pimipanit tshekuannu miam ka petakushinanunit kie uin mineu kaiminiti mashinaikana kie eshi-ueueshiakaniti auenu nete kaueueshtakanit.

Tshek^u kamakunueshit ne ka nakatuapamat kamakunakaniti?

Eukuannu utatusseun muk^u tshetshi nakatuapamat nenu kamakunakaniti kie uin uitsheueu nete ka ueueshtakanit e tutiakaniti. Passe nete utenaua, uinuau uetshit kamakunueshiht uitsheueuat nenu kamakunakaniti nete kaueueshtakanit e tuteiatu.

Ueueshiakanipan ninapem e utamuat nikussa e uapamak.

Ishinakuannu a nikuss mak nin tshetshi uauitamat ka ishpanit nete kaueueshtakanit etatau anitshenat ka kutunnueshit ashu nish^u ka taht miam eshinakuak nete kaishetshimakanit?

Nenu tshika tshitapatakanua eshinakuanit eshi-ueueshiakanit ne tshinapem, kie eshi-tapuetak kie mak eka tapuemakanit. Kie ishinakuan tshetshi uauitamek^u eshi-tshissenitamek^u ka ishpanit etatau anitshenat ka kutunnueshit ashu nish^u. Tshika tshitapamakuaut uauitamek^u ka ishi-tshissenitamek^u ka ishpanit tshekuan ka ut ueueshiakanit ne tshinapem, apu tshika ut kukuetshitakut uinuau tshekuannu. Anitshenat muk^u kaimishit kie kaimit tshika kukuetshimikauaut tshekuanna. Uinuau anitshenat ka kutunnueshit ashu nish^u tshika tshissenitamuat tshetshi tapuemakaniti nenu ka ueueshiakaniti.

Tshekuan ne issishuanu kaimisht?

Nenu utatusseun eshinakuanit ne kaimisht tshetshi uitshiat nenu ka ueueshiakaniti, kie eshinakuanit tshetshi uitshiat nete kaueueshtakanit ka pimipaniakaniti eshi-ueueshiakaniti.

Niminikun uauitamun nete ka uitshiakanit auen eka ka minu-tutuakanit. Tshekuan uiauitakanit?

Anite ka atushkatet ka uitshiakanit anitshenat eka ka minu-tutuakanit pimipanitakanu ne atusseun, ka mamishitsheumishit uitshiakanut eshi-pimipanit ueueshitunnu. Apu tshishikashunanut, kie tshin tshutinen tshetshi uitshikuin.

Nenu eshi-uitshiat auennu:

- tshi uauitamakun eshi-pimipanit ka ueueshiakanit tshetshi uitshikuin tshetshi nishtutamin eshi-pimipanitakanit;
- tshi uauitamikun eshpanit tshe ueueshikuin;
- eshk^u eka pimipanikuin nete ka ueueshtakanit tshi uauitamakun tshe ishi-pimipanit kaueueshtakanit;
- tshuitshikaun tshetshi tutamin tshimashinaikan tshetshi uauitamin eshi-matenitamin eka ka minu-tutakuin, kie muk^u tshin ui tutamani ne mashinaikan.
- tshika nanatu-tshissenitakanu nete tshipa uauitshikaun etain utenat, patush ui apashtaini ne ua ishi-uitshikaun eku tshe tutakuin; kie tshetshi uauitshitishuin tshika nanatuapatakanu tshetshi uitshikaun eshk^u eka pimipanikaun nete kaueueshtakanit.

Tapuemakanu nitimush ka utamut kie makunakanu. Shash tshishtakanu ka ishi-ueueshiakanit. Ek^u tanite tshetshi tshissenimak tshe ishpush unuitshinakanit?

Anitshenat ka uitshiat auennu eka ka minu-tutuakaniti anite kamakunitunanut ka atusset tshipa tshi uitamakut tshe ishpush unuitshinakaniti. Nete tshe nanatu-tshissenimitau etusset mashinaikanitshuapit tshetshi uitshishkau. Nete takuana nenu umashinakanitshuapuau St.John's, Carbonear, Clarenville, Gander, Grand Falls-Windsor, Marystown, Corner Brook, Stepenville, Port Saunders, Happy Valley-Goose Bay, mak Nain. Ek^u nanatuapatamani nete pessish etain ne utenau, nete ka aiminaniu-mashinaikanit tshe natuapatamin, ume itashteu eka ka minu-tutuakanit ka uitshiakanit (Victim Services).

Eshinakuak tshekuan tshipa tshisseniten eshk^u eka uauitamin ka ishi-tshissenitamin ka ishpanit nete kaueueshtakanit.

Mitshet auenitshenat apu nita pitutshet kaueueshtakanit, at tshetshi uauitakau eshi-tshissenitak ka ishpanit tshekuannu! Kushtam^u passe auen ka tshissenitak tshekuannu ka ishpanit. Kie kushtam^u tshetshi uauitak ka ishpanit nete pessish uikanisha tshekuannu tshetshi uauitamuat auennu eka nishtuapamat, e maniteutshenimat. Nasht ishinakuan tshetshi uauitamin ka ishi-tshissenitamin ka ishpanit tshekuan nete kaueueshtakanit. Eukuan tshe uauitakanit minuut kie nenu kukuetshimuna nanitam kuekuetshimunauti nete kaueueshtakanit.

Ninapem tshika ueeshiakanu katshi utamut. Ne kamakunueshit ka nanatu-tshissenitak ka ishpanit niminik^u mashinaikannu tshetshi uauitamuk nete kaueueshtakanit. Tshetsh^u kaueueshtakanit nenu uiauitak?

Nete ka pikunakanit Tshishe-utshimau utapuetamun ka ueueshtakanit pimipaniakanu auen. Ait ishi-tutakanu nenu Tshishe-utshimau utapuetamun ka pikunakit. Kanipauiht ka nakatut ait ishi-pimipaniakanut. Apu tapuetuakanit auenitshenat tshetshi tat nete uikanishimauat ka ueueshitut. Ait ishi-pimipanitakanu kaueueshtakanit ne eka ka minu-tutak ueeshiakaniti. Nasht nenu tshika ui takuannu tapuennu eshi-ueeshiakanit. Ait ishi-pimipanitakanu kaueueshtakanit uikanishimauat ka ueueshitut, miam mate auen eka ka pikushinaimuat kau iat shunianu.

Tshekuannu uet tapuetuakanit auenitshenat nete kaueueshtakanit? Nasht eka ka nishtuapamakau apu takuanit utatusseunuaut!

Nete Canada, ishi-tshitapatakanu eka ka minu-tutak auen tshika ueeshiakanu. Tshika ui uapatiniakanut anitshenat ka ishi-pimipanitakanit ueueshitunnu tshetshi tapuetakanit nenu eshi-anuenimakanit katshi pimipaniakaniti ka ueueshtakanit. Passe

eshinakuaniti eshi-ueueshiakanit auen apu tapuetak kaimit tshetshi taniti auenu nete kaueueshtakanit.

Ishinakuan a tshetshi ituteian nete kaueueshtakanit?

Ehe, ishinakuan tshetshi itutein nete kaueueshtakanit katshi minikuin mashinaikan etashtet tshetshi itutein e uitamakuin tanite, e tatutipaikana kie tshék^u tshishik^u. Ek^u eka ituteini, tshipa tshi itashueu kaimit tshetshi makunakuin. Kamakunueshiht tshika makunikuat, patush utitshipanikuini tshetshi pimipanikuin nete kaueueshtakanit tshetshi uauitamin ka ishi-tshissenitamin tshékuan ka ishpanit.

Katshi uauitamakau kamakunueshiht eshi-tshissenitamuk ka ishpanit tshékuanu, nuni-tshissituauat tshetshi uitamukau kamakunueshiht nenu ka nanatu-shetshikuian anite nikaiminanimit, nipa tshi a itutan nenu ka petakushit e nanatu-shetshit nete pimipaniakaniti kaueueshtakanit?

Mishta-ishpitenitakuan tshetshi uauitamutau kamakunueshiht kassinu eshpish tshissenitamut ka ishpanit tshékuanu. Tshissitamani kutak tshékuan ka ishpanit uipat tshe uitamutau kamakunueshiht. Tshe eka ashuapatamin miam pimipananuti e ueueshtakanit. Kie ishinakuan tshetshi uitamukanit ne kaueueshiakanit eshi-ueueshiakanit kie eshi-mamishimakanit. Ek^u ishinakuaniti eka ishpushinanunit, tshipa tshi nakaikanu e ueueshiakanit kie mak tshipa tshi uepinakanu nenu eshi-ueueshiakanit.

Kie ishpiteitakuan tshetshi mashinataikanit eshi-tutakanit tshékuan, tshipa tshi uitshikun nete pimipaniakaniti ka ueueshtakanit, tshika uitshikun tshetshi tshissitamin ka ishpanit tshékuan e tatutipaikana kie tshishik^u. Nenu ka mashinataimin ka ishpanit tshipa minauat kamakunueshiht.

Nishetshin kie nikushten tshetshi ituteian nete kaueueshtakanit. Tau a auen nipa uauitshik^u eshk^u eka pimipananut kaueueshtakanit?

Anitshenat ka uitshiat auenu eka ka minu-tutuakaniti tauat tshetshi uauitshiat auenu kamamishitshemuniti nete tshe pimipaniakaniti

kaeueshtakanit. Tshika uauitamakuan eshi-pimipanit kaeueshtakanit kie tshipa tshi uitshekuat nete ituteini kaeueshtakanit, patush tshin uetshit natuenitamani. Apu natuenitamuakanit auen tshetshi tshishikashut nenu eshi-uitshiakanit. Anite ut Tshishe-utshimau pimipanu e uitshiakanit auen.

Nitshissenimik^u nuitsheuakan eshpish shetshuk tshe uauitamuk ka ishi-tshissenitamuk ka ishpanit tshekuannu kie nishitshimik^u tshetshi peikunakan kie mak nishunakan minuk shumnapunu tshetshi minuenimuk eshk^u eka ituteuk nete kaeueshtakanit. Ek^u eka minuanu nenu eshi-shitshimit nitenimau. Tan etenitamut tshin?

Tshi tapuen. Nasht apu minuat ne etashumikuin. Tshissenimishkau anitshenat kaimiht, kaimishiht kie mak kamakunueshiht, tshipa tshi nekaikanu ka ueueshtakanit kie mak tshipa tshi uepinakanu ne ka mamishitsheumuin. Kie tshipa tshi makunik^u kaimit patush ashtekushuini, ek^u tshipa tshi minikun tshetshi uauitamin eshi-tshissenitamin ka ishpanit tshekuan.

Apu nita uapataman kamakunueshiht ka tutamutau nimashinaikannu e uauitamukau eshpanit tshekuannu. Nipa tapuetakaun a tshetshi uapataman nimashinaikan eshk^u eka uauitaman eshi-tshissenitaman?

Tshishe-utshimau ukaimishima tshe aimit tshetshi natuenitamut tshetshi tshitapatamut nenu tshimashinaikannu eshk^u eka pimipanit kaeueshtakanit.

Tan tshe itashpashuian nete kaeueshtakanit?

Ishpitenitakuan tshetshi minuashpashuin. Apu shuk^u mitshetit auen tshetshi iat umatshunishim e minuaniti. Eka shetshi eka kanuenitamani e minuati tshimatshunishima, enuet minu-nakunikau.

Nikushten tshetshi shissikut tshetshi shetshian, kie mak maian, miam uauitamani ka ishi-tshissenitaman tshekuan ka ishpanit. Tan

nipa ishi-tuten tshetshi eka shetshian?

Ishinakuan tshetshi itenamuin tanite eukuan eshinakuat. Kie uinuau kamakunueshiht eukuan e ititau eshk^u eka uauitak ka ishi-tshissenitakau ka ishpanit tshekuannu. Tshipa tshi tshishkutamatishun tshetshi eka shetshin (miam mate petikatshish tshipa nenen).

Tshipa tshi uitsheuu auen tshetshi uitapamashk eshk eka ueueshtakanit. Tshipa uauitamau nitamuk tshekuannu muk atut tshetshi uitamau nenu ka ishi-tshissenitamut ka ishpanit tshekuannu. Nasht apu ishinakuak tshetshi uauitamut kutak auen ka ishi-tshissenitamin muk^u ne Tshishe-utshimau ukaimishima, kie uin tshika uapamik^l eshk^u eka uauitamin ka ishpanit tshekuan eshi-tshissenitamin.

Tshekuan nipa tuten katshi taiani nete kaueueshtakanit?

Uipat takushinini nete kaueueshtakanit, kie tshipa ui nanatu-mishkuau Tshishe-utshimau ukaimishima tshetshi uitamut shash tekushinut. At peikuan katshi uapamati uipat, tshe uitamut shash tekushinut.

Ek^u nasht eka tshiuenumukau eshi-kuetshimit anitshenat kaimishit?

Apu tshika ut tshi kushtinitishuin eshi-kuetshimikuin tshekuan nasht ishinakuan tshetshi uitamin ka ishi-tshissenitamin. Tshika ishi-tshitapamakaun tshi maneniten kaueueshtakanit, mishta-ishpitenitakuan, kie tshipa tshi makunakaun.

Ek^u shissikut maiani?

Eka natu itenita maini nete kaueueshtakanit. Nanitam mauat auenitshenat nete kaueueshtakanit. Passe anitshenat ka tshissenitakau ka ishpanit tshekuannu, kuetslimeuat kaiminiti tshetshi uenapissish punanunit.

Nikushten tshetshi eka nishtutukau kaimishiht tshe ishi-kuetshimitau tshekuannu. Tan nipa ishi-tuten?

Eka nishtutamani eshi-kuetshimikuin tshekuan, tshe uitamut ne kaimit. Minuat tshika kuetshimikun, kie mak ne kaimit tshika minu-uauitamak

eshi-kuetshimikuin tshekuan. Eka shakuenimu eka nishtutamani eshi-kuetshimikuin tshekuan. Nenu kaueueshtakanit aimunna nanikutini apu tshi shuk^u nishtutak auen eka ka atusset nete eshi-pimipani kaueueshtakanit.

Tshekuan ne tshe ishpanit kaimisht nakaiki mekuat e uauitamuk eshi-tshissenitamuk?

Peik^u kaimisht nakaiki e uauitamut ka ishi-tshissenitamut, tshe punin e aimin. Papeik^u kaimishit tshika natutakut kaiminiti eshk^u eka uetashutaminiti tshetshi minuut uauitamut ka ishi-tshissenitamut.

Kutunnuqipunueshu nitauassim tshika uauitam^u ka ishi-tshissenimat ninapema. Takuannu a tshipa ishi-uitshiakanu nitauassim ka ishi-tshissenitak tshekuannu ka ishpanit?

Anite Tshishe-utshimau utapuetamuna takuannu tshetshi uitshiakanit anitshenat Eka Ka Minu-Tutuakanit kie ka tshissenitakau ka ishpanit tshekuannu eshk^u eka kutunnu ashu nishuaush-tatupuneshitau (kie uitshiakanut auassat eka katshi uitshitishutau kie mak eka katshi minu-aimitau). Miam mate: ka tshissenitak ka ishpanit tshekuannu eka ka minutuakanit, tshipa tshi uitapameu pessish epiniti nete kaueueshtakanit kie tshipa tshi akunakueuakanu kie mak tshipa tshi anakanu unuitamait katshipekanishit nete kaueueshtakanit. Eukuan eshi-tutanikau nenu issishueunit uauitshieunna ishinikateua kie kaimit nenu tshika ui tapuetam^u patush tshetshi apashtanikau. Tshetshi minupanit nete kaueueshtakanit eukuan eshi-tutakanit ka pimipaniakanit ka ueeshiakanit auen.

Anitshenat ka uitshiat auennu eka ka minu-tutuakaniti atushkatamupanit tshetshi uitshiakanit auass ka tshissenitak tshekuannu ka ishpanit kie uikanisha. Anite tshe aimiek^u umashinaikanitshuapauat St. John's, Carbonar, Clarendville, Gander, Grand Falls-Windsor, Marystown, Corner Brook, Stephenville, Port Saunders, Happy Valley-Goose Bay mak Nain. Anite tshe natuapatamek^u ka aiminanut mashinaikanit etashtet ka uitshiakanit anitshenat eka ka minu-tutuakanit (Victim Services).

Ni tshishenniun nin au eka ka minu-tutakuian, muk^u apu akushian. Nipa tshi a natueniten issishueun uauitshieunna kie nin?

Ne issishueun uauitshieunna takuanua tshetshi uitshiakanit auen ka tshissenitak eshpanit tshekuannu kie eka ka minu-tutuakanit ka kutunnu ashu nishuaush nuash nete eshi-inniut (kie eka ka akushit tshetshi aimit). Kaimit nenu uetashutam^u, uin tshissenitam^u tshetshi ishi-uitshiakaniti nenu ka pimipaniakaniti nete kaueueshtakanit. Nenu tshitapatam^u eshi-ueueshiakanit auen, eshinakuanit nenu eka ka minu-tutak, e tatupipuneshiniti nenu eka ka minu-tutuak, e tatupuneshiniti kie eshi-uitamakut nenu ka ishi-tshissenitamaniti tshekuannu; kie kutaka tshekuannu mitshenu.

Apu kanuenimat ukaimishim ninapem kie uin ukaimishimitatishu nete kaueueshtakanit. Uitam^u tshetshi kuetshimat miam anitshenat aitu ka aimishit eshi-tutakau tshika kuetshimeu tshekuannu nenu nussima ka kutunnue-tatupipuneshiniti ashu kutuasht, ka tshissenimikut ka utamut. Tan nipa ishi-tuten tshetshi nakaiman ume?

Ka aimisht tshipa tshi kuetshimakanu tshetshi miam ishi-tutak tapishkut ka aimishit ka minakanit tshetshi kuetshimat tshekuannu nenu ka tshissenitamaniti (miam ne tshussim pimipaniakaniti nete kaueueshtakanit) eshinakuaniti uin uetshit auen ka ukaimishimatatishut. Uipat tshe uitamut ne Tshishe-utshimau ukaimishima tshetshi ueueshtat e uitamuak kaiminiti. Kie uin ne katshissenitak ka ishpanit tshekuannu tshipa tshi natuenitamueu kaiminiti.

Uauitakanua anuenitamuna katipan eishinakuanikau kie eshnikatanikau

Tshin eka ka minu-tutakuin nete uikanishimaun piuenimitun, tshititenitenatshe tan tshe ishi-anuenimakanit ne ka mamishimit. Uin kaimit tshika uetashutam^u tshe ishi-anuenimakanit. Eukuan tshe uauitamakuin uta mashinaikanissit eshi-anuenimakanit kie eshnikateniti anuenimituna nete ka tshishenniuit ka ueeshiakani.

Anuenimitun- Kaimit muk^u anuenimeu auennu eka ueeshiakani ka tapuemakaniti.

Nutim patshitinakanu ka ishi-ueeshiakani- Kaiminiti tapuetamanua e tapuemakanit, muk^u apu tshi umashinaikuakanit nenu eshi-tapuemakanit. Eukuan ka ishpishasht anuenimitun tekuat, kie anite muk apashtakanu eka ka mishta-tutak eka minu-tutakanit, nasht ushkat eka minu-tutakanit. Ne kaueeshiakani minakanu tshetshi unuit eka makunakanit kie apu minakanit tshetshi nashatak etashumakanit. Apu apashtakanit ume anuenimitun nete uikanishimau ka piuenimakanit eshi-ueeshiakani auen.

Patshitinakanu ka ishi-ueeshiakani muk^u nakatuapamakanu- Ne kaueeshiakani tapuemakanu muk^u apu mashinataikanit nenu ka ishi-pikunak tapuetamunnu. Muk^u itashumakanu tshetshi nashatak e nakatuapamakanit. Ek^u eka nashapataki nenu ka itashumakanit tshipa tshi ueeshiakani minuat. Kie nashataki nenu ka itashumakanit apu tshika ut umashinaikanit nete ka ueeshitakanit.

Tshika tshishikashu eshi-anuenimakanit / eshi-natuenitakanit / natuenitamuakanit- Eukuan ume anuenimitun ka natuenitamuaknit ne kaueeshiakani tshetshi tshishikashut shunianu. Anite kaueeshitakanit tshika tshishikashu, kie tshika minakanu tipaikanu tshe ishpish ashuapamakanit.

Pikushunaitsheu kau- Anite kaueeshitakanit itashumakanu tshetshi pikushinaimuat nenu eka ka minu-tutuat.

Ka nakatuapamakanit- Katshi tapuemakaniti ne eka ka minu-tutak, kaimit tshipa tshi anuenimeu tshetshi nakatuapamakaniti. Anite utenamit nakatuapamakanu kie tshetshi nashamuat etashumakut kaiminiti. Nenu ishinakutakanua e nakatuapamakanit, tshetshi eka nutshikashut, tshetshi tshishkutamashut, tshika takuannu tipaikannu tshe ishpish pitshet anite etat, tshetshi eka pikunak tapuetamuna, kie kutaka tshekuana eshi-minakanit. Ek^u eka nashaki nenu ka itashumakanit tshipa tshi minuat ueeshiakanu e pikunak ka ishi-tapuetak tshetshi nakatuapamitishut.

Tshika tutam^u etashumakanit anuenimitun- Ume anuenimitun ishinakutakanu tshetshi makunakanit nete uitshit. Minakanu tshetshi nashak etashumakanit anite utenamit etat. Patush nasht eshinakaniti tshetshi unuit tshika tapuetuakannu. Ek^u eka tapuetaki kie eka nashaki ka itashumakanit, tshipa tshi kau makunakanu kie ekute tshipa tshishtau ka ishpish minakanit e makunakanit nete kamakunitunanut.

Makunitun anuenimitun- Kaimit etashueti tshetshi makunakanit auen ka ueeshiakanit anite kamakunitunanut itashauakanu.

Apishish makunitun anuenimitun- Auen ka anuenimakanit tshetshi makunakanit peikushteu-tatunnu tshishikaua kie mak apishish, kaiminiti tapuetaku tshetshi ueeshtakanit tshe ishpish pitshet kamakunitunanut tanite atusseu. Mate passe kamakunakaishit, makunakanut nameshinu nuash minashtakanu, kie tauat passe auenitshenat etusset nameshinu nuash minashtakanu ek^u makunakanut ushkat atushkanu nuash neu tshishikunu. Kaimit muk^u tshi uetashutam^u tshe ishi-makunakaniti ka atusseniti auennu. Kie anitshenat etusset muk^u tapuetuakanut tshetshi ishi-makunakanit.

Ka uauiepinanut ka uauitakanit tshe ishi-anuenimakanit- Ka uauiepinanut ka uauitakanit tshe ishi-anuenimakanit auen ka ueeshiakanit ishi-tutuakanut muk^u innuat. Nenu uet tutuakanit tshetshi mishkakanit tshipa ishi-ueeshtaut ka ishpish eka minu-tutak, kie ne ka uitshikanit eka ka minu-tutuakanit kie ka atusseshit uishamakanuat tshetshi kie uinuau tat nete ka uauiepinanut tshetshi uauitakanit tshipa ishi-anuenimakanu nenu ka ishi-ueeshiakanit. Ka ueeshiakanit, eka

ka minu-tutuakanit, kaimit, Tshishe-utshimau ukaimishima, kaimisht, kie kutakat ka atusseshit nete innu-assit mamuitut eshk^u eka tshitshipananut e uauitakanit tshipa ishi-anuenimakanu. Uin kaimit uetashutam^u tshe ishi-anuenimakaniti auennu katshi kassinu natutuau auennu kaiminiti nete ka uauiepit.

Auen eka ka minu-tutuakanit natuenitamuakanua auennu eka ka minu-tutakut tshetshi etatu tshishikashuniti- Auen eka ka minu-tutuakanit katshi anuenimakaniti nenu eka ka minu-tutakut ka umashinaikuakaniti kie mak eka ka umashinaikuakaniti nete tapuetamuna etashteniti kie mak ka pikunak tapuetamunnu nete *Matshinatukuna kie kutakanu ka kushtikunit Tshekuannu* ka pikunak tapuetamunnu. Ek^u natuenitamuakanu tshetshi tshishikashut patetat-tatunnuiapiss ek^u e mishta-ishpitenitakunit ka pikunak tapuetamunnu peikumitashumitunnu natuenitamuakanu tshetshi tshishikashut. Ek^u etenitaki ne ka ueueshiakanit tshetshi eka tshi ishpish tshishikashut nenu ka natuenitamuakanit. Natuenitamueu nenu kaiminiti tshetshi eka utinaminiti nenu kaiminiti eshi-natuenitamuakanit tanite apu minupanit tshetshi ishpish tshishikashut nenu ka ishi-natuenitamuakanit.

Eshinikateti Kaueeshtakanit Aimunna

Anite kaueeshtakanit tapuetamuna animitshenitakuana kie animenitamuat anitshenat eka ka minu-tutuakanit nete uikanishimat. Tshipetenatshe eshinikatanikau aimuna eka nashtutatishuin kie mak eka nita petamin. Apu peikussin. Mitshet auenitshenat apu nita petakau aimunna ka apashtanikau. Ek^u tshima uitshikuin ume eshi-uauitamakuin, tshetshi etatu tshissenitamin eshinikateti aimunna ka apashtakaniti nete tshishennuat ka ueeshiakanit kaueeshtakanit.

Piuenimitun- Mitshetuaite ishinakuan piuenimitun: e tatinakanit auen eka tapuetak, matshi-tutamun, umitunenitshikanit ka akuiakanit auen, etenimut auen ka akuiakanit, kie nete atusseunit ka matenitakuak piuenimitun.

Kaueeshiakanit auen- Auen ka mamishimakanit ka ueeshiakanit

Patshitinakanu ka ishi- ueeshiakanit, apu tapuemakanit.

Nanakanakanu uenapissish- Kaimit nanakanam^u kaueeshtakanit uenapissish patush minuat tshika uitam^u tsheshe ishpish minuat kau pimipananut kaueeshtakanit. Uin muk^u kaimit tshi nanakanam^u.

Eakuan ishinakuanupan- Tshi uiten tshakuan ka tutakanit eka ka minuat kie mak pikunam^u auen tapuetamunnu.

Mishkutinakanu kaueeshtakanit- Mashinataikanu tshetshi natuenitakanit uetashutamun tshetshi takut kaueeshtakanit pimipananut. Ne auen ka natuenitak nasht tshika ui ishinakuanu tshetshi pimipaniakanit nete takut kaueeshtakanit. Ne nasht eshinakuak (miam mate: uin kaimit ka petaik eshi-uauitak tapuetamunnu nenu eshi-ueeshiakaniti auenu). Ek^u eshinakuati tshetshi natuenitakanit takut kaueeshtakanit tshetshi pimipananut, apu ushkat tshitshipananut nenu ka ishi-ueeshtakanit ushkat kie apu natuenimakanit ka ishi-tshissenitak tshekuannu tshetshi uauitak. Muk^u tshiam kau minuat pimipananu ushkat ka ishi-pimipananut nete kaueeshtakanit.

Mashinaikannu minakanu tshetshi mashinatautishut-

Kamakunueshit minueu nenu mashinaikan e uitamakuin tshetshi tain nete kaueueshtakanit tshetshi tshiuenuimuin aimun ka mamishimikuin. Anite mashinaikanit uitakanu tshe ishpish takushinin, etatutipaikana tshe tain, kie nete tshe ueueshtakanit. Ek^u eka taini nete ueueshtakaniti tshipa tshi itashuenanu tshetshi makunakanit ne ka ueueshiakanit.

Nasht ushkat uitamuakanu eshi-ueueshiakanit nete ka mishta-ueueshtakanit.

Uauitamaku kaiminiti eshi-pikunak tapuetamuna. Ek^u uitam^u ne kaueueshiakanit tshetshi tapuemakanit kie mak eka tapuemakanit. Ek^u nenu issishueti apu tapuemakanit, ek^u tshe pipipaniakanit ka ueueshtakanit, patush nete aishkat tshika pipipaniakanu. Eku ne ka mamishitshemut apu tshika ut tat nete nasht ushkat uitamuakaniti nenu kaueueshiakaniti, muk^u uin ui tati tshika tshi tau nete kaueueshtakanit.

E makunikanit auen- Kamakunueshit uetinati auenu eka ka minututaminiti tshi makuneu. Makunikanu auen patush katshi tshissenimakaniti tshe ishi-ueueshiakanit kie mak tshetshi eka ueueshiakanit.

Ka tatinakanit auen eka ka tapuetak- Auen ka tatinat kutaka auennua eka tapuetakut, kie mak ka ui tatinat kie mak ka nanatu-shetshiat, eka tapuetakut. Mitshet ishinakuan eka ka tapuetak auen tshetshi tatinakanit, e ushukuikanit auen nete uiat, e apashtakanit tshekuannu tshetshi ushukuikut, kie e mishta-ushukuikanit auen.

Tshetshi unuitishinakanit kie mak tshetshi eka unuitishinakanit- Auen kaueueshiakanit ka pikunak tapuetamunnu, uin kamakunueshit tshissenimeu tshetshi eka unuitishinakaniti auennua kamakunat, nete kaueueshtakanit ituteieu. Ek^u tapuetaki ne Tshishe-utshimau ukaimishima tshetshi eka unuitishinakanit, ek^u pipipaniakanu nete kaueueshtakanit. Tshika uauitakanu eshi-pikunak tapuetamunnu. Ek^u nenu ukaimishima ne kaueueshiakanit tshika uauitamanua tshekuannu tshipa ut unuitishinakanu. Anitshenat ka tshissenitak eshpanit uishamakanu tshetshi uauitak ka ishi-tshissenitak tshetshi tshissenimat ne kaimit tshe ishi-tutuak.

Nasht tshekat tshitshue tapuetatishun- Eshi-pitakatakanit tapueun nete ka ueueshtakanit e tapuemakanit auen eka ka minu-tutak. Apu takuak tshetshi tshekat tshitshue tapuetatishun kie mak ne auen eka ka minu-tutak, eukuan eshi-tshitapatakanit nete kaueueshtakanit.

Ka pikunak- Eka ka tapuetak etashumakanit tshetshi nakatuenitak ka ishi-minikut kaiminiti nete kaueueshtakanit. Tshipa tshi ueueshiakanu nenu pikunaki ka ishi-uitamuakanit tshe tutak tshakuan.

Mamashinataikanu ka ishi-ueueshiakanit- Kaimit uinuau uetashutamut ka ishi-ueueshiakanit. Mamashinataikanu tshetshi nashtutak eshi-ueueiakanit.

Eshi-ueueshiakanit- Ka makunueshiht ka ueueshiat auennua eka ka minu-tutaminiti.

Nashik^u ka ueueshiakanit itashauakanu nete ka mishta-ueueshtakanit- Auen eka ka minu-tutak, nete ka mishta-ueueshtakanit pimipaniakanu, nasht takuanniti kie nukuanniti nenu eshi-ueueshiakanit.

Ka mamashitshemut- Auen ka issishuet apu minu-tutak.

Uitam^u e tapuemakanit- E tutak mashinaikannu e uitak e tapuemakanit eka ka minu-tutak, nenu kamakunueshiniti e uitamuat. Patush tshi uapataki Tshishe-utshimau ukaimishim ek^u patush tshe pitakatakanit nete kaueueshtakanit.

Manenitamun nete kaueueshtakanit- E nushtat eshi-pimipanit kaueueshtakanit. Eka tapuetak tshetshi tshiuinak utaimun eshi-kuetshimakanit tshekuannu nete kaueuestakanit.

Tapuemakanu kie umashinaikannu ka ishi-ueueshiakanit- Auen ka tapuemakanit eshi-ueueshiakanit eka ka minu-tutak.

Kaimisht- Tshishe-utshimau kaimisht.

Nete kaueueshtakanit itashumakanu- Anite kaueueshtakanit

itanshumakanu tshetshi nashatakanit.

Eka ka minu-tutak - Ueueshituna ka uauitanikau.

Ueueshituna ka uauitakanikau- Anite Canada ka takuanikau ueueshituna.

Mitshetuau eka ka minu-tutak- Anite Tshishe-utshimau utapuetamunna takuannu ume eshi-uauitakanit. Nanikutini ishinikateu ka pipaminashuakanit auen ka nanatu-shetshiakanit; nanitam ka nanatu-aimiat kie ka tshitapamataitiniti; kie e nanatu-shetshiat kie e shetshimat nenu utauassiminu.

Aitu kaimishit kukuetshimeut nenua ka uishamakaniti- E kukuetshimakanit ka tshissenitak eshpanit eka ka minu-tutakanit, nenu ukaimishiminu eka ka minu-tutaminiti. Kie uin ne Tshishe-utshimau ukaimishima kukuetshimeu tshekuannu.

Makunakanu (eka ka minu-tutak)- Makunakanu, kie mak kamakunakanit.

Makunakanu (uikanishimau makunitun)- Auen ka ueueshtakanit tshe tat katshi nakatutau kie mak unipaunuaut ka nakatak. Auass kamakunakanit ait ishi-pimipanitanu, nenu e tshi tshishkutamashut kie nete tshe nitaushinakanit kie nete tshe tat tshitapatakanu. Peik^u muk^u uikanishimau minakanu tshetshi kanuenimat.

Auen ka ueueshiakanit- Auen ka pikunak tapuetamunnu ueueshiakanu; ka ueueshiakanit ishinikatakanu.

Kaimisht kukuetshimeu ka uishamat auennu- Ka tshissenitak ka ishpanit kukuetshimiku tshekuannu kaimishiniti.

Tshishe-utshimau ukaimishima mineu kutak kaimishiniti kassinu mashinaikana kie mak kaishetshimakaniti kie mak akunikana eshi-ueueshiakaniti- Kaimit tshipa tshi pimipanitau nete kaueueshtakanit tshetshi uetashutak tshe ishpanit eshi-ueueshiakanit ne eka ka minu-

tutak.

Eshi-uetashutet tshekuan- Mashten nete uauitakanu tshe ishi-uetashutakanit nete kaueueshtakanit.

Tanite kaueueshtakanit ua ishi-ueueshiakanit (ka mishta-ueueshtakanit kie mak nashik^u kaueueshtakanit)- Auen ka ueueshiakanit ka pikunak tapuetamunnu ka ishpiteinitakuannit, uin minakanu tanite ua ueeshikushit.

Eshi-minakanit nete kaueueshiakanit- Mashinaikana e uauitakanit, e mashinataikanit eshi-tshissenitak, kie mak e uitak eshi-nashtuapatak tshekuannu ka ut ueueshiakanit auen nete kaueueshtakanit ka apashtanikau.

Mashinaikan ka shakassinitakanit at eka tat peik^u auen- At eka tat peik^u auen, pimipanitakanu ka ueueshtakanit (miam mate, ne kaueueshiakanit) uin muk^u etat.

Uikanishimaun piuenimitun- e tatinakanit uiat eka tapuetak, e matshitutuakanit, umitunenitshikanit e piuenimakanit, kie shunianu ka piuenitak, anite muk^u uikanishimaunit, kie mak e uitapamat uitimusha ka piuenimat.

Nasht ushkat e pimipaniakanit nete kaueueshtakanit- Nasht ushkat tshishikunu e ueueshiakanit eka ka minu-tutak: kaimit kuetshimeu tshetshi tapuemakaniti kie mak eka tapuemakaniti.

Tapuenu- Kaimit kie mak ka kutunnueshiht ashu nish^u uetashutamuat tapueunnu nenu ka ueueshiakaniti e tapuemakaniti. Anite ka ueueshtakanit uitam^u nenu e tapuemakanit.

E tipatshimunanut- Ka tshissenitak tshekuan ka ishpanit uitamaku kutaka auennua. Apu tshissenitak kie apu petak ka ishpanit tshekuannu. Apu tshissenitak kie apu petak ka ishpanit tshekuannu. Apu tshissenitak tshekuannu nasht ka ishpaunit. Eshi-tipatshimushtuakanit kutak auen, apu apashtakanit nete kaueueshtakanit, kaimisht nekaim^u tshetshi eka uauitakanit nete kaueueshtakanit. Uin kaimit tshika ueuetashutam^u.

Kaimit apu tapuetak tshetshi pitakatakanit nete ka ueueshtakanit- uauitamun kie mak mashinaikan apu tapuetak kaimit tshetshi pitakatakanit nete ka ueueshtakanit.

Ka mishta-itenitakuak eshi-ueueshiakanit- Mishta-itenitakanu ka pikunak tapuetamunnu kie tshika mishta-makanakanu.

Uauitamun- Mashinaikan uauitakanu eshi-ueueshiakanit nete kaueueshtakanit.

Ka kutunnueshiht ashu nish^u ka naushunakanit- Utinakanuht kutunnu ashu nish^u tshetshi tatau nete ka ueueshtakanit.

Ka ueueshiakanit auen- Katshi mamishimakaniti auen eka ka minutak, kamakunuesht tshissenimeu tshe ishi-ueueshiakaniti eka ka minutaminiti.

Nasht tapuetam^u auen Tshishe-Manitu-mashinaikannu- E uitak auen nasht tapueunu, Tshishe-Manitu-mashinaikannu e apashtakanit. Auen eka tapuetaki tshetshi apashtakanit Tshishe-Manitu-mashinaikannu, uitam^u eka tapuetak.

Ui nakaikanu- Tshishe-utshimau ukaimishima, ka ueueshiakanit ukaimishima, kie mak ne ka ueueshiakanit (uin uetshit uitshitishuti) kanuenitam^u tshetshi nakaik^u etenitaki eka ishinakanit tshetshi uitakanit nete kaueueshtakanit. Miam mate nasht eka ishinakuak tshakuan tshetshi uitakanit nete kaueueshtakanit. Uin kaimit uetashutam^u nekaikaniti aimun. Ek^u tapuetaki apu uitakanit nete kaueueshtakanit.

E pikunakanit Tshishe-utshimau utapuetamuna- Auen e pikunamuat utapuetamunnu Tshishe-utshimau, ueueshiakanu.

E uepinakanit ka ishi-ueueshiakanit- Tshishennu ka ueshiakanit, tshipa tshi natuenitam^u tshetshi uepinakanit ka ishi-ueeshiakanit. Tshika shakassinita mashinaikannu tshetshi natuenitak nenu eka ka mishta-

ishpitenitakunit eka ka minu-tutak, katshi nishtupipuna tshishtat neu ka ueueshiakanit. Patush katshi patetat-tatupipuna katshi ueueshiakanit ek^u tshipa tshi shakassinitau umashinaikan e mishta-ishpitenitakunit ka pikunak tapueunnu. Anitshenat ka nakatuenitak e uepinikanit ka ishiueshiakanit, itashaimuakanut nenu mashinaikannu.

Ka nakatuapamakanit kamakunakanit- Uipat ka unuitishinakanit auen kamakunakanit. Unuitimit nete ka makunitunanut tshishtamutinanu. Minakana tshe nashatak etashumakanit, pikunaki kau tshika makunakanu.

Katshinamun nete kaueueshtakanit katshi tapuetatishut- Ne ka ueueshiakanit katshinau nete kaueueshtakanit. Makunakanu auen ka katshinat nete ka ueueshtakanit.

Tapuanu kie mak apu tapuanut- Ka ueueshiakanit kuetshimakanu tshetshi tapuanut kie mak apu tapuanut nenu eshi-ueueshiakanit.

Eshi-uetashutakanit e tapuemakanit- Tshishe-utshimau ukaimishima kie ne kaueueshiakanit ukaimishima tapuetamuat eshi-ueueshiakaniti e tapuemakaniti, uin kaimit tshika uetashutam^u tshe ishi-tapuetak.

Nanakanikanu uenapissish- Kaueueshtakanit nanakanikanu uenapissish.

Nanatu-tshissenitakanu eshk^u eka pimipanitakanit ka ueueshtakanit- Kaimit uetashutam^u tshetshi pimipaniakaniti nete kaueueshtakanit. Patush nete ka mishta-ueueshtakanit tshi tutakanu ne eshi-uauitakanit kaueueshtakanit.

Mashinaikan tutakanue uauinakanit ka ueueshiakanit kue minuanut nete kaueueshtakanit- eshk eka uauitakanit- tshe ishi-anuenimakanit ne ka ueueshiakanit. Uitshiku nenu kaimit tshe ishi-uetashumat anuenimati. Ne kanakatuenimat ka ueshiakaniti tutamucu nenu umashinaikannu.

Eshk^u eka pimipananut kaueueshtakanit- Pitama uapamitut kaimit mak kaimishit mak ne tshe ueueshiakanit. Nenu uauitamuat tan tshe

ishpish pimipanit kaueueshtakanit, kie tan tshe ishi-ueueshiakanit kie kutaka tshekuana tshishat uauitamuat nete kaueueshtakanit tshe ishi-uauitak pimipaniti kaueueshtakanit.

Apu tapuetakanit tshetshi unuipanitakanit/natuenitakanu tshetshi eka unuipanitakanit- Kaimit uetashutam^u tshetshi eka unuipanitakanit eshi-ueueshiakanit auen, auassa kiemak ka matshitutuat.

Matshi-mannakanu- Kaueueshiakanit matshi-mannakanu.

Nakaikanu tshe ishi-anuenimakanit uenapissish- Kaimit utinam^u tipaikannu tshetshi minu-tshitapatak kie nanatu-tshissenitak, tapuetamunnu nanatu-tshissenitam^u, kie mak minuat tshitapatam^u ka ishi-ueueshiakaniti eshk^u eka uetashutak.

Anuenimitun- Anuenimakanu auen ka tapuemakanit eshi-ueueshiakanit.

Uauinakanu tshe ishi-anuenimakanit- Kaimit uauitamuakanu eshi-tapuemakaniti tshetshi uitshikut tshe ishi-anuenimat.

Tshekuan e itutakanit nete kaueueshtakanit- Mashinaikana itashaikanua nete kaueueshtakanit.

Essishuanut- Auen ka uauitak eka ka minu-tutakanit, minueu tshetshi mashinataikanit kie mak uauitamueu ka ishi-tshissenitak nenu kamakunueshiniti.

Mashinaikan tshetshi itutet nete kaueueshtakanit- Anite ut kaueueshtakanit shitshimakanu ne ka tshissenitak ka ishpanit eka ka minu-tutuakanit, tshetshi itutet, ek^u eka ituteti tshipa tshi makunakanu.

Apu mishta-itenitakunit eshi-ueueshiakanit- Eka ka mishta-itenitakuak ueueshitun. Apu mishta-anuenimakanit at ishpish ka mishta-anuenimakanit. Muk^u iat tshipa tshi makunakanu. Anite nashk^u kaueueshtakanit pimipaniakanu.

Mashinaikannu ka minakanit tshetshi tat kaueestitakanit- Shitshimakanu tshetshi uauitak ka ishi-ueueshiakanit. Uitamukaanu, tshishikunu, pishimua, pipunnu, e tatipaikana kie tanite kaueeshtakanit tshetshi pimipaniakanit. Tshika makunakanu eka ituteti.

Auen ka tapuemakanit eka ka minu-tutak- Nasht itenimakanu uin tapuemakanu ka ishi-ueueshiakanit.

Issishueun- Ka tshissenitak uauitam^u ka ishi-tshissenitak eka ka minu-tutakanit.

Pimipaniakanu- Kaueeshtakanit pimipaniakanu, eka ka minu-tutak, uauitakanu eshi-tapuemakanit kie mak eka tapuemakanit.

Nanatu-tshissenimakanu eshi-tapuemakanit- Kaimit kie mak ka kutunnueshit ashu nish^u nanatu-tshissenimeuat tshetshi tapuemakaniti kie mak eka tapuemakaniti eshi-ueueshiakanit.

Ka tapuetatishut tshetshi itutet kaueeshtakanit- Kaueeshiakanit mashinatautishu, tapuetatishu tshetshi itutet kaueeshtakanit. Nenu umashinaikan itashtenu tshetshi eka pushit nete uiesh, tshetshi uitamuat kamakunueshiniti nete etat, kie tshetshi eka aimiat auenu nenu etashumikut kaiminiti. Eku eka tutaki nenu etashumakanit tshika ueueshiakanu.

Uetashutamun- Anite kaueeshtakanit uetashutakanu katshi pimipaniakaniti kaueueshiakanit ka tapuemakanit kie mak eka tapuemakanit

Auen eka ka minu-tutuakanit- Auen kie mak auenitshenat eka ka minu-tutuakanitau, ka piuenimakanitau.

Auen eka ka minu-tutuakanit mashinaikannu ka tutak e uauitak eshi-matenitak eka ka minu-tutuakanit- Minakanu auen eka ka minu-tutuakanit tshetshi uauitak eshi-matenitatak, kaiminiti tshitapataminua nenu umashinaikan. Uauitam^u ka ishi-akuaiikut nenu eka ka minu-tutakut.

Ueueshitun ka pimipaniakanit ka tshissenitak eshpanit eka ka minu-tutuakanit- Kaimit uetashutam^u tshetshi uauitaminiti eka ka minu-tutuakaniti.

Mashinaikannu apashtakanu tshetshi makunakanit- Anite kaueueshtakanit natuenitakanu ne mashinaikan tshetshi makunakanit.

Katshissenitak eshpanit- Auen uauitam^u ka ishi-tshissenitak eshpanit. Itashumakanu tshetshi itutet kie uin nete kaueueshtakanit.

Ka mashinaitshenanut

Ka mashinaitshenanut

PLIAN ui tshissenitamuat etenitamut umenu umashinaikanissimuau ka tutakau.

Tshi uitshikun a ume mashinaikaniss? Tshekuan uitshikuin kie mak eka uitshikuin?

Tshekuan tsheshkutamatishuin e apashtain ume mashinaikaniss?

Ma takuan kutak tshekuan tshipa uauitakanu ume eshinakuak mashinaikaniss?

Ma takuan kutak tshekuan ua issishuein?

Anite tshe itashinamin:

Public Legal Information of NL, Suite 227, Tara Place, St. John's, NL, A1B 3W8 or fax to: 722-0054

info@publiclegalinfo.com

**Public Legal
Information**
Association of NL

Suite 227, 31 Peet Street
St. John's, NL, A1B 3W8
Phone: 709-722-2643
Toll Free: 1-888-660-7788
Fax: 709-722-0054
info@publiclegalinfo.com